

“Yes da kimoete eon, kianyunete; arai kito kiimoata
kikusitauon kere.”

**Epone
Lojenunet
Edeke**

EPONE LOJENUNET EDEKE

Kwape araar Aburam “eparero loka Edeke” kotoma anonokikite kede arimariteke ipedori ijo da ajenun Edeke ka amisiikin aitimike, ainapakin karereng Ajenun Edeke kotoma arimarit cut kotoma amun Des erai ibore yen epolo ajenun kotoma aijar. Erai naka aumokin ebe itoodikini Edeke kere luemoete Des ka ikecetawon kere.

Arai ibelokin jo, kinye atupit ekonirod bon korima cut Edeke ebuni Emoyoke aiboi kotomakon. Mam ibore epedori atiakar ijo kotoma aminake naimunor ijo akeisumuneta, kosodi atupit Des kotoma arimarit eraun Des Ekonideke ibuni jo araun Akekirimet naketai. Ibuni angicun ebe kigwelit Des ijo ketiai loepol, kosodi ekoto eidic kajo-kwann ido ikaru kere.

Kingit Edeke koinak ijo aijen kwape isisia ijo apapulai nuelimoritai kotoma akirot naka Edeke. Edeke apukokin itunga lualaunaka aiwadika akiro nu kosodi aidar koipone kaloaumokin adaun aturio karaida ketamit Satana aiputar cut.

Nukiwadikaere nuelimoritai koitabo kayen elemunitai kobaibuli: Ikisil (Torah), Isabulin (Zabur), aiwadikaeta nuka inabin ka Eijir (Injil).

Ikisila 6:4ii, 5

EJAKAIT Ewokodeke erai **EJAKAIT** ediopet: Kominenena **EJAKAIT** Ekonideke kekonitau kere, ka akoniijar kere, ka akonigogoŋ kere.

Isaia 45:18

Naarai ebala kwanata **EJAKAIT** laosubuni akuj; ŋes Edeke; lokilunuluŋi akwap, kosub: kiticat, mam asubuni atai, kilunuluŋi tere iboikinoi kotoma, ebe: Arai eoŋ **EJAKAIT**; emamei ece.

1 Ikabakan 8:60

Tetere ejenunete atekerin kere nuka akwap ebe **EJAKAIT**, ŋes Edeke; emamei ece kere.

Isaia 42:8

Arai eoŋ **EJAKAIT**: ŋopenol ekakiror; mam ainakini ice akai-buses, karaida akaiturio mama ejaas aputosia nuegerer.

Isaia 43:10, 11

Ebala **EJAKAIT** ebe, Iraas yesi ikakajenak ka ekakejaanakinan lokaseunit: . . . ijenunete ebe eoŋ **Ŋopenol**; Emamei Edeke lokesubitai ageikin eoŋ, mam ejaun da lokatupakini. Eoŋ, eoŋ obe, arai **EJAKAIT**; Emamei eketajaran dimarai eoŋ.

Isaia 45:22

Kosesenai, kitajarunos, isaneta kere luka akwap: naarai arai eoŋ Edeke, emamei ece.

Isabulin 103:8, 11

Ileleba EJAKAIT aisioni, esiana da, iyapi anyunyurikin, epol da akeitim. Naarai kwape ejaar akuj kuju noi akwap, epol kwanin akeitim mama ejaas lueyonito nes.

Isabulin 103:17i, 18ii

Konye aitim naka EJAKAIT ejai ameun apaarasia nuŋo kiton apaarasia kere mama ejaas ŋul lueyonito nes, . . . mama ejaas luericito aitutuketeke, ka luitunito aicorakinetake aitodol kes.

Mika 7:18

Iŋai bo Edeke loiputos kajo, loisioniei numam adolit, . . . naarai isiyalamikinit aitim.

Akuudian 3:22

Mam enaŋi aitim naka EJAKAIT, naarai mam iŋorari aisionike.

Akuudian 3:32

Naarai karaida keyauni ican, konye isionie nesu kwape ejaar apolou naka aitimike.

Isabulin 18:25i

Mama ejai yeniketimon itodianakini aitim; mama ejai yenikadoliton itodianakini adolit.

1 Aisiitonokin 16:34

Kimalata do EJAKAIT: naarai ejok nesu: naarai ejaenena akeitim ikar kere.

Yeremia 31:3

Abu EJAKAIT ketaknikin kolo-
sek, ebe, Eebo, kekilakina jo ka-
min namam edaun; ñes kerionia jo
kasianut-nakamin.

Yeremia 29:11

Naarai ebala EJAKAIT ebe,
Ajeni eoñ aomisio nuaomit kanu-
kus, aomisio nuka ainapakin,
kwabo mere nueroko, ainakin yes
amunokina nuepote.

Malaki 1:2i

Ebala EJAKAIT ebe, “Kamina
yes.”

Isaia 38:17

Koany, kanuka ainapakinika,
ñes kariebar noi: konye kamina-

kon ibu kitajar aijaraka kaipany
naka amudiaro: naarai icaka aka-
ronisio kere kaukon.

Isabulin 103:13

Kwape itimio papa ikedwe,
kwape kwanin itimi EJAKAIT
lueyoñito ñes.

1 Yokana 4:16i, 19

Kijeni, kipou keyuut da, amin
naejai Edeke mamawok. Kimina
oni, naarai ñes kigei amin oni.

Sepania 3:17

Ejai EJAKAIT Ekonideke kidin-
kon, lokirigi loitajari: iyalamikini
ñesi kanukon kaillel; iyeñi ñesi ka-
minake, elakari kayoore kanukon.

4 IBORE YEN EPOL NOI KAIJAR NGES AIJENE EDEKE

Daniel 11:32ii

Konye do icasito ituna luejenete Ekecedeke, iswamaete nukatitiŋ.

Yeremia 9:24

Konye yeneolobobot koolobobote kana ebe kamisiikinit, ido kaje-ni eoŋ, ebe arai eoŋ EJAKAIT loeswamai nukasianut, nuketube, ka nukadolit da kakwap: naarai eba-la EJAKAIT ebe, “Kesiyalamikinito akiro ŋun.”

Isabulin 119:2

Isirerenitoi ŋul luericito aitejenu-netake, luemoete ŋes kekecetau kere.

Ikisila 30:19ii, 20i

Ebe ebwaik akonyenekon aijar ka atwanare, arerenŋ ka ekenit: aso

do koseu aijar, tetere ijari, ijo ka aurikon: Kominenena EJAKAIT Ekonideke, korima ekeporoto, kimorikikinos kaŋes: naarai ŋes aijarakon.

Kosea 6:6

Naarai emiela aitim konye mere asuban; ka aijene Edeke aitelekarit ainakineta nuicweio.

Isabulin 42:1

Kwape iyeŋanakinor amiam kanuka akipi nuka aleles, kwape kwanin iyeŋanakinor ekatau kanukon, wu Edeke.

Anyoun 33:14

Kotema ŋes atiar, “Ajaenena eoŋ kajo, eoŋ da kesiyenuni jo.”

2 Aisiitonokin 15:2ii

Ejai EJAKAIT kayes, naijaatar yesi kaṅes; arai imootos ṅes, idumunete; konye arai ijalete ṅes, ṅes da kijali.

Yeremia 17:9

Iṅalana etau aitelekarit iboro kere, ido epol akedek noi: iṅai bo epedori ajenun ṅes?

Awaragasia 16:25

Ejai erot loeomit etuṅanan bon ebe ejok, konye osaṅeke kes irotin luka atwanare.

2 Petero 2:4, 9

Naarai arai mam abu Edeke kitim imalaikan naadiakariata, ko-

nye kocakak kes ataro, kibwaik da apanya nukamuton, aidaria atubokinio. Ejeni Ejakait ayuun lueyoyito Edeke kotoma acodunio, ka aidar lumam edolito kiticanete kiton apaaran naka atubokinio.

1 Samuel 12:15i

Konye arai mam ipupenenete eporoto loka EJAKAIT, kipaliikis aicorakinet naka EJAKAIT, ṅes itusurupio akan naka EJAKAIT yes.

Yokana 15:6

Ituṅanan arai mam esali toma-kaṅ, eakario kiṅa kwape katenu, erinyori; etukokinio atenuna, eakakinio akim, kidoposi.

6 IBUSAKINIT ONI AMOOTE EDEKE TETERE KIJENUNI NGES

Yes da kimoete eoŋ, kianyunete;
arai kito kiimoata kikusitauon
kere. —Yeremia 29:13

Awaragasia 2:4, 5

Arai kimoi ŋes kwape epuesa,
kirii ŋes kwape abar naibwaitai;
ŋes konyet ijenunia ayonit EJA-
KAIT, idumuni da aijen Edeke.

Kilipa, kiinakinio; komoata, idu-
munete; kikuŋukuŋoto, kiŋai-
kinio. —Matayo 7:7

Iburanian 11:6

Konye neemamea aiyuun mam
epedor aitelel ŋes. Naarai yeniku-
nyakini Edeke ibusakinit aiyuun
ebe ejai ŋesi, ido ebe eropi ŋul
luemoete ŋes.

Amia ŋul lukaminas eoŋ; ka ŋul
da lukadunyakinito amoot kaa-
nyunete. —Awaragasia 8:17

Akuudian 3:25

Ejok EJAKAIT kama ejaas
luidarito ŋes, kama ejai aijar nae-
moot ŋes.

Aswamisio 17:26i, 27

Kojautene ediopet kosub ateke-
rin kere nuka ituŋa aibio kakwa-
pin kere, . . . tetere emoete Edeke,
moto erarapete ka adumun ŋes;
karaida mam elwana kaneejai
ŋinidiopet kaoni.

Konye eoŋ, ti akoto amoot Ede-
ke, ido ti akoto aititiŋ Edeke aka-
kiro. —Yob 5:8

2 Aisiitonokin 30:9ii

Naarai esiana EJAKAIT Ekusi-deke, lokaitim da, mam ibelokini akekonyen kamakus arai ibonunte mamake.

Isabulin 86:5

Naarai ijok ijo, EJAKAIT, itemokino aisioni, epol aitimikon mama kanul kere lukiwoneete jo.

Yakob 4:8i

Kikunyakis neejai Edeke, nes da ikunyuni mama ijaas. Yes ika-diakanarak, kilota akaninikus, kitalautu itauon, yes luejaas itauon iarei.

Isaia 1:18

Inera EJAKAIT ebe: "Kopotu ca do, kenerutu: Karaida kereṅak

adiakanaretakus be, ekwaṅuunete kwape kakile; karaida kireremata kwape kaokot, iliacaunete kwape ka epaaba."

Isabulin 145:18

Eapie EJAKAIT kama ejaas luiwoneete nes kere, kama kanul kere luiwoneete nes kabeit.

Matayo 11:28, 29

Kopotu neajai, yes kere luitaarios ka lukilanirikinito, eoṅ da kesiyenuni yes. Korionata ajookotoka, kisisiautu kamakanṅ; naarai etasiono eoṅ, eyapepera kotau, yes da idumunete aiyenun kotauonokus.

Din da yenebuni mamakanṅ mam cut ereṅeari. —Yokana 6:37ii

Anyoun 15:11i

Wu EJAKAIT, inai eputosi bala jo kotoma odekesinei? . . . loibus kotoma alaunit?

1 Samuel 2:2i

Emamei loelaunit kwape EJA-KAIT; naarai emamei ice dimarai ijo.

Yob 34:10ii

Madi Edeke, aswam nueroko; madi Lokapedor kere, aswam numam edolito.

Isaia 57:15i

Naarai ebala kwanata nɔl loicelelei loimukurur loiboikini nemam edaun, Ekekiror Lokalaunan ebe: "Eboie eoŋ kaibois naicelelei nakalaunan. . . ."

Isaia 6:3ii

Lokalaunan, Lokalaunan, Lokalaunan, EJAKAIT loka ajoresio: Akwap kere ileleba akeibuses.

Isabulin 145:17

Edolit EJAKAIT korotinique kere, esiana da kaswamisioke kere.

Marako 10:18ii

Emamei yenikajokan dimarai ediopet, ŋes Edeke.

Apukokinio 15:4i

Wu Ejakait, inai bo yenimam kiyonit jo, ka aitopolorit da ekonikiror? Naarai ijo bon lokalaunan, naarai epote atekerin kere, emaete da kakonyenekon, naarai atakanut aswamisiokon nukadolit.

IBUSAKINIT ITUNGA LUKA EDEKE ARAUT LUKALAUNAK

9

Yakob 2:19, 20

Iyuunit ijo ebe erai Edeke edio-
pet; iswamai ejok. Iyuunete ajo-
kin da, komaranete. Ijo etunanan
lotai, ikoto kereka ajenun ebe
aiyuun komameete aswamisio
erai arakan?

Awaragasia 15:9

Erot loka ekaronon erai loketale
kaneejai EJAKAIT: konye emina
nesi loetupari adolit.

1 Yokana 2:4; 3:10

Yeninera ebe, "Ajeni nes," ko-
mam ericit aicorakinetake erai ike-
ngalan, emamei da abeit kotoma-
keŋ. Kana nes etakanuniata idwe
luka Edeke ka idwe luka Satan; nin

kere yenimam iswamai nukadolit
mam erai yenika Edeke, karaida
yenimam emin onaceke.

Iburanian 12:14

Kotupata ainapakin nepepe ki-
tuŋa kere, ka alaunite da, neema-
mea nin emamei yeneanyuni Eja-
kait.

1 Petero 1:15

Konye kwape eraar lokinyarit
yes lokalaunan, koraut yesi da lu-
kalaunak koponesiokus kere.

Amos 5:14

Komoata ajokis, konye mere
aronis, tetere ijarete: tetere ejae-
nena EJAKAIT, Edeke loka ajore-
sio kayes, kwape kibalatar.

Mika 6:8ii

Inyo bo kiburai EJAKAIT, mere aswam nuebeito, amin aitim, alo-sit da kaitasono nepepe ka Ekonideke?

Ilebin 19:2ii

Koraas lukalaunak: naarai eoŋ EJAKAIT Ekusideke arai lokalau-nan.

Luka 10:27ii

Komina Ejakait Ekonideke ke-konitau kere, ka akoniijar kere, ka akonigogoŋ kere, ka akonicoa kere; ka ekoniidunyet da kwape iminari bon.

Marako 10:19

Ijeni aicorakineta ebe, Siriari,

Siridote, Sirikokoi, Sirisabanaki-nenei, Sirirodi, Koyonŋitenenei pa-pakon ka totokon.

Iromayon 12:2i

Kwabo sirikiputo nuka ikar kalu, konye kanuka aisiteteunio naka aomisiokus kijulakinos.

Yosua 1:8

Eitabo lo loka ikisila sirenyou-nunei kaitukukon, konye koomoo-moenenei ŋes paaran ka akuare da, tetere iricit aswam kere kwape ejaatar nuiwadikatai toma: naarai kwaŋin ŋes erereŋior ekoniroto, ikerianaror da.

Marako 11:22ii

Kiyuutu Edeke.

Awaragasia 6:16-19

Ejaas akiro akanykape nuelait EJAKAIT; eebo, akanykaarei nue-raas nuketa! kamaken; akonye nuepogas, anajep nakejalan, akanin da nuebokorete aokot numam akirot; etau loepwakuni aomisio nukaronok, akeje nuisunyito akerit mama ejai ameneranut; ekajenan lokainal loesabi, ka nol da loeyei ikinyom luka anolopa koinacan.

Isaia 61:8i

Naarai eoñ EJAKAIT amina etube, alait akoko ka numam adolit.

Apukokinio 21:8

Konye ikuriesik, ka lumam iyuunito, ka luesiliaka, ka ikaa-

rak, ka idotea, ka ikacudak, ka luemaete aputosia, ka ikejalak kere, ejaun akorakinetekc toma anolol naenoki kakim ka acukuman; nes atwanare nakiareit.

Malaki 2:15ii, 16i

Aso do kokoito ikusimoyon, kinyek idiopet amodomod aberu naka atumunike. Naarai ebala EJAKAIT Edeke . . . Alait airenear, nin da yenerapiarit ekegoe kadeden.

Sekaria 8:17

Kinyek idio kayesi aitetemonor aronis kotauke aluikin ikeidunyet; siriminas aiyaposit naka ainjal: naarai ebala EJAKAIT ebe, Nun kere eraas nuasacit eoñ.

12 MAM ITUNGA EDOLOKINITOS NUIPUDA EDEKE

Yokana 5:42

Konye kajeni yes, ebe emamei amin naka Edeke kotomakus.

Yakob 2:10

Naarai yenerici ikisila kere, konye kibuca kediofet, egwauni akiro nuka kere.

Isaia 6:5

Kasodi atemar atiar, “Wu okwe! Abei ai? Naarai atwana, naarai arai eoŋ etuŋanan loka aituk namam elai: eboie da kokidiŋ otuŋa luka aituke numam elaete: naarai aanyut akakonye Ekabaka, EJA-KAIT loka ajoresio.”

Aso yenejeni aswam nuejok, komam iswamai, erai adiakar kama-keŋ.
—Yakob 4:17

Iromayon 3:10

Kwape iwadikatere ebe: Ema-meikadoliton, karaida idiopet.

Iromayon 3:23

Naarai adiakasi kere, komam edolokinito aibuses naka Edeke.

1 Yokana 3:10ii

Din kere yenimam iswamai nukadolit mam erai yenika Edeke, karaida yenimam emin onaceke.

Isaia 53:6i

Kapaasi oni kere kwape amere-kekin: kibelokin ŋinituŋanan orotoke.

1 Samuel 6:20ii

Iŋai bo epedori aibwo kakonyen nuka EJAKAIT, Edeke lo loka-launan?

ASWAMISIO WOK MAM EPEDORETE AISIALAMIKIN EDEKE

13

Iromayon 10:2, 3

Naarai etejenuni kanukec ebe edunyaka kanuka Edeke, konye mere kotoma aijen. Naarai kanu-mam ejeniata adolit naka Edeke, kokotos aitogogon adolitekec ki-kulepek, mam apotu korimasi adolit naka Edeke.

Isaia 64:6i

Naarai kiraun isio kwape yeni-mam elai, adolitekosi kere esubit bala anapito naamodok.

Esekiel 33:13

Arai kalimok ikadoliton ebe abeit ejari; arai kemunokin ake-dolit, kiswama numam adolit,

mam iitunio adio kaswamisioker nuadolito; konye etwanikini numam adoliteke nueswamat.

Iromayon 8:8

Kes da luejaas toma akuan mam epedorete aisiyalamikin Edeke.

Iromayon 3:20i

Kanuka nun emamei yenejai akuan yenitojokio araut yenedolit kakonyeneke kanuka aswamisio nuka ikisila.

2 Ikorinton 3:5

Mam sio kilosikino aomit bonik araut ibore kanukosi; kwabo ebuni aisilosikiniokosi kama ka Edeke.

14 KITIAKARIT ONI ARONIS KAMA EJAI EDEKE

Iromayon 5:12

Kanuka nun kwape kelomunia adiakar akwapin kanuka etuñan ediopet, kolom da atwanare kanuka adiakar, kwanin kodolok atwanare otuñ kere, naarai apotu kere kodiakasi.

Isaia 59:2

Konye apotu numam adolitekus kogitasi yes ka Edekekus, ki-bwaata akusironisio akekonyen kamakus, tape eneri apupun.

2 Aisiitonokin 24:20ii

Inera Edeke kwanata ebe, Kanukinyo itapaariata yesi aicorakineta nuka EJAKAIT, kinyeis ake-riakar? Naarai ijalata EJAKAIT, ñes da kijali yes.

1 Samuel 15:23i

Naarai epali esubit bala adiakaret naka aidwar, ka aninik bala aputosia nuegerer ka iterapim. Naarai iner ijo akirot naka EJAKAIT, kinger ñesi da jo araut ekabaka.

Awaragasia 11:19

Dol loiketakina kadolit edumuni aijar: ñol da loetupari aronis earakini bon.

Esekiel 18:20i

Etau loeswamai aronis, ñes etwani.

Yakob 1:15

Kosodi kepotuu eimiel euriei adiakar, adiakar ñin da kepoloor idouni atwanare.

ANYUNYURA NAKA EDEKE EJAI KANUKA ARONIS 15

Isabulin 7:11

Edeke nes ekatubon lokadoliton; eebo, nes Edeke loisiopit nini-paaran.

Nakum 1:3i

Iyapi EJAKAIT anyunyurikin, eiliili da akepedor, lomam itojoki luegwaunito akiro.

Ikolosain 3:6

Kanuka nun nes ebunokinia anyunyura naka Edeke odwe luiulaka.

Iromayon 1:18

Naarai epukoritai anyunyura naka Edeke abunore kokuju mama ejai epali kere ka amamus adolit naka ituna luitikokinete

abeit kanuka amamus adolitekec.

Iromayon 1:29-32

Ileleba amamus adolit kere, nukaronok, airaŋaanut, amengeranut; ileleba ekokote, earit, aŋolopa, aŋal, aomisio nueroko, ikedeideok, ikasiomak, luelaito Edeke, lukepali, luepogaka, luituros, ikapwakak nueroko, luiulakinito ikauriakakec, luemamei acoa, luejalete aitutuket, lumam eminanara, luemamei aitim, luejenete aitepesenit naka Edeke, ebe luiswamaete nuikote nen ibusakinit atwanare, mam bon iswamaete nun, konye itojokito da nul luki-swamaete nun.

Iburanian 9:27

Ido kwape itemokinitere ituna atwanare irwan atipet, kosodi akaulo kañin atubokinio.

Matayo 12:36

Katemari yes atiar, Ninikirot nakejal naineras ituna itodiarete kapaaran naka etube.

Ekalimonokinan 12:14

Naarai eyauni Edeke niniswam toma atubokinio, nepepe ka ninikirot nakibwaitai, arai naejok arai naerono.

Matayo 13:49, 50

Ikoni nen awasia naka akwap. Epote imalaikan, etiakarete lukaronok kama ka lukadolitok, ecaka-

kinete kes oupa loka akim; ejaun kañina aimony ka airiamanakin ikel.

Apukokinio 20:12, 15

Kaany da lukatwak, lukapolok ka ludidik da, ebwoete koingaren keicolon, kopukoroi iitabon. Kopukoroi eceitabo da, loerai loka aijar. Kotubokinai lukatwak kotoma nun kanuewadikatai oitabon kwape kejaatar aswamisiokec. Arai kedumun idiotuñanan yenimam iwadikatai toma oitabo loka aijar, kocakakinai añolol naka akim.

Iburanian 10:31

Erai akirot naesogim aibirokin akanin nuka Edeke lokajaran.

Awaragasia 15:3

Ejaas akonye nuka EJAKAIT
niniibois, irereete aronis ka ajokis.

1 Samuel 16:7ii

Naarai mam EJAKAIT eseseni
kwape esesenia itunanan; naarai
itei itunanan atakan nakokuju,
konye itei EJAKAIT etau.

Isabulin 94:9

Ŋol lokiswamauni akit, ŋes
emam epupi? Lokesubi da akoŋu,
ŋes emam eanyuni?

Isabulin 139:1-4

Wu EJAKAIT, ibu koŋic eoŋ, ko-
jenu da. Ijeni aiboika ka anyouni-
ka da, ijeni akaomisioit eroko

elwana. Inici ekasokot, ka apero-
ka da, ijeni da ikarotin kere.
Naarai emamei akirot kaŋajep-
ka, konye koany, wu EJAKAIT,
ijeni ŋes cut.

Yeremia 16:17

Naarai esesenete akakonye iro-
tinikec kere: mam eŋopito kako-
nyeneka, ido numam adolitekec
mam imunonounos kakonyeka.

Iburanian 4:13

Kwabo emamei isubat yenimam
etakani kakonyeneke, konye imu-
jalalas iboro kere, ido ideleleete
kakonyen nuka ŋol loejaas akiro-
wok.

Esekiel 18:23

Ebala Ejakait EDEKE ebe, “Esiyalamikinit tope atwanare naka ikaronon? Konye gwai kibelokin korotoke, kojar?”

Luka 13:3

Katemari yes atiar, Mam; konye arai mam yes itoronikinos, imudiaros kere kwape kwanin.

Awaragasia 28:13

Loibwai aibucaretake mam eke-rianari: konye nol loelimori kosodi aisac edumuni aitimio.

Yoel 2:12, 13i

Konye ebala EJAKAIT ebe, Kibelokinos yesi mama ajai kitauonokus kere, kailun, ka

aimony akiyo, ka aibworo: kocila itauonokus, kwabo mere inapenekus. Kibelokinos mama ejai EJAKAIT Ekusideke: naarai esiana nesi, ileleba aitim, iyapi anyunurikin, ebarara aitim.

Kosea 14:2i

Koyanau akiro, koboŋu mama ejai EJAKAIT: kolimok nes ebe, “Kolema numam adolit kere, kocam nuejok.”

Yob 33:27, 28

Itei Nes itunga arai ejai idioyen ebala adiaka eoŋ. Adiaka eoŋ, kebelok nuedolito, . . . Alaku ekatau kinye alomar toma aipany, akaijar da esesenenei aica.

Isaia 55:6, 7

Komoata EJAKAIT kapak naepedoror adumun, kiwoneete nes kapak naepiar. Kojal ikaronon ekerot, yenimam adolit da akeomisio: koboŋu mama ejai EJAKAIT, itimi nes; mama ejai Edekewok, naarai isionie noi.

Isabulin 34:18

Eapie EJAKAIT kaneejaas nul kere luebilil itauon, itajari nul luejaas emoyo loitoronikina.

Yeremia 36:3ii

Kibelokinos ninituŋanan ainyein ekerot loerono, kesioni numam adolitekec ka aronisikec.

Isabulin 32:5

Abu kalimok jo akaronis, komam ebwait numam adoliteka: kabala ebe, "Alimori adiakareta-ka mama ejai EJAKAIT." Ibu kisioni numam adolit nuka akaronis.

1 Yokana 1:9

Arai kilimori adiaakanaretawok, erai nesi lomunot ido loedolit, isioniei oni adiaakanareta, itesegari da oni kama kamamus adolit kere.

Aswamisio 3:19i

Aso do kitoronikinos, kibelokinos, komwatarai akusidiakanareta.

Aitironikin nges ainyein aronis kalimor mama ejai Edeke.

20 ASUBANIT NAIPUDAI KANUKA AISIMORIKIKIN ONI KA EDEKE

(Aronis abu koyangau agitaro,
apapulai 14.)

Ilebin 1:4; 17:11

Idokokini akekan akou naka ainakinet naicweio; ecamunio kanuken alucio nes. Naarai aijar naka akuan ejai toma aokot; ainak yes kotem alucio aijarakus: naarai aokot kes elucete kanuka aijar.

Iburanian 9:22

Abeit kotoma ikisila aapiei iboro kere aitesegario kaokot, ido arai emamei abukor aokot emamei aisionio.

Anyoun 12:5i, 13i

Sirienwalit imerekekikus, ikilio-

kit yenika ekaru ediopet: . . . Ko-raas aokot aanyunet mama ijaas kotogoi luijaas; kaany eoŋ da aokot aleleŋi yes, kwabo mam ejaun atular amudiar yes.

Ageun 22:8i, 13

Kotema Aburaam atiar, "Kadumakini eoŋ Edeke imerekek yenikainakinet naicweio, ikakoku." . . . Kitonyou Aburaam akekonnyen, kosen, ido koany, kojai emerekek kaukeŋ, ikamunit amoni amumwarake: kolot Aburaam koyana emerekek, koinak araun ainakinet naicweio aibois naka ikekoku.

Kapaaran naatupakini koany Yesu ebunit mamake, kotema atiar, “Koany Imerekek yenika Edeke, yenelemari adiakar naka akwapin! . . .” —Yokana 1:29

Aponi kimanai, kwabo kitasono komam eoŋit akeituk; kwape kimerekek yenyanyaario aario, ido kwape ililinia amerekek kakonyen nuka ikekatubok ajul: eebo, mam kooŋ akeituk. —Isaia 53:7

Iburanian 9:12, 28i

Kwabo mere kanuka aokot nuka akinei ka itak lurosok, konye kanuka akeokot elopet, abu koloma irwan atipet bon Aibois Nakalau-nan, nakedaunia adumun alakun naka ikar kere. Kwape kwaŋin

Kristo da, nakeinakinere irwan atipet aibwok adiaakanareta nuka ikepuak.

1 Petero 1:18i, 19

Kojenete ebe mam aponi kola-kun yes kiboro luedaunos, kwape epuesa arai esabu, . . . dimarai kaokot nuketiai loepol nuka Kristo, kwape nuka imerekek yene-mamei aŋwal, karaida akemer.

Iburanian 9:14

Itelekarito cama aokot nuka Kristo, lokeinakin bon mama ejai Edeke kotoma Omoyo loka ikar kere, araun asubanit naemamei akemer, itesegarete aomisiokus kaswamisio nukatwak tetere ijaanakinete Edeke lokajaran.

22 AITAJARUNIO AINAKINET NAKA EDEKE BON

Iromayon 3:24, 25i

Akesianut naeinakini atitai ñes itojokit kes araut luedolito, kanuka alakunio naejai toma Kristo Yesu, loibwaikinit Edeke araut aitupucet kanuka aiyuun akeokot.

Iromayon 5:8, 9

Konye iturit Edeke akemin mamawok, naarai nakirokor kirai ikadiakanarak abu Kristo kotwanik oni. Aso aitelekarit noi kiidau kwana aitojokio kotoma akeokot, kitajario da kanukeñ alemunio kama ejai anyunyura.

Igalatian 2:16i

Konye kijeni ebe mam ituñanan itojokio araun yenedolit kanuka aswamisio nuka ikisila, dimarai

kanuka aiyuun Kristo Yesu, isio da kipou keyuut Kristo Yesu.

Naarai asianut ñes kitajari yes kanuka aiyuun; kwabo mam kebuni kamakus, ñes ainakinet naka Edeke, mam kebuni kanuka aswamisio, kinyek ituñanan kere aolobobotor. —Ipeson 2:8, 9

Aswamisio 10:43

Ñol ñes itejenunitos inabin kere ebe kanuka ekekiror ñnituñanan yeniyuuni ñes edumuni aisionio naka adiaakanareta.

Aswamisio 4:12

Kwabo emamei aitajar kotoma ece kere: naarai emamei ecekiror kokwap kakuj loeinakinitai ituña, loibusakinitor oni aitajario.

Luka 1:26-38

Kolap lokikanyetekape aponi kijukunai emalaika Gaburiel kama ejai Edeke alosit Galilaya ore Nasaret, mama ejai abekot nakisinerit ekiliokit ekekiror Yosep, lokokek loka Daudi; ekiror loka abekot nes Mariam. . . . Kotema emalaika nes atiar, "Sirikiyon, Mariam, naarai idum asianut kama ejai Edeke. Ido koany, ipotuuni, idouni ikoku yenitelepat, imaikini ekekiror Yesu. Eraun nol lokapolon, enyarao Okoku loka Je loejai kaju kakuj; . . . akejakanut damam enaji." Kotema Mariam emalaika atiar, "Ikwaikinete bo ai nun,

naarai mam ajeni ekiliokit?" Koboŋok emalaika nes ebe, "Kidoikini jo Emoyo Lokalaunan, kirapiari agogon naka Je loejai kaju kakuj; kanuka nun yeneuruunio enyarao yenikalaunan, Okoku loka Edeke. . . . Naarai emamei akirrot naikaruni Edeke." Kobala Mariam ebe, "Koany, arai eon abulesit naka Ejakait; kojaut mamakan kwape kakonikiro." Kosodi konyou emalaika kamaken.

Itunga bon luelomunito akwap komam erai kanuka aimorikikin naka ekiliokit kaberu eraas Adam ka Kristo. Koyangau Adam aronis akwap, konye Yesu koyangau aipikor aronis.

Ipilipin 2:6, 8

Lokejai einono loka Edeke, komam imarakina arianakin ka Edeke araun ibore yenimariauna. Abu kotakan ejaas kasubunet bala naka etunganan, kitasonikin, korima kiton atwanare, atwanare da naka emusalaba.

Yokana 10:30, 36

Kirai eoŋ ka Papa ipe. Ibalasi kereka yesi lokitalauni Papa kijuk akwapin ebe, "Iinyanakini Edeke;" kanu abalar ebe, "Arai eoŋ Okoku loka Edeke?"

Yesu Kristo, Akirot Naebusi ajai sek. Kotoma nuaumokin abu Edeke koinak Nges apotuunio kakoik naka Mariam.

Kakwan ejena Nges kwape Okoku loka Etunganan, Komoyo ejena Nges kwape Okoku loka Edeke. Itosomaete nukiwadi-kaere akirot "Okoku" aitiŋenun ejautene loka Edeke Kakekirot—Yesu Kristo.

Iburanian 10:5

Naarai naalomunia Kristo toma akwapin abala ebe, . . . konye ibu kitemok akuan kanukaŋ.

Iromayon 1:4

Loedakakinitai araut Okoku loka Edeke kapedor kwape ejaar Emoyo loka Alaunit, kanuka ajarun kokatwak.

Yokana 20:28

Ko boŋok Tomas ebe, "Ekajakait, Ekadeke da!"

1 Timoteo 3:16i

Ido komamei abunokin, epol noi aiyeyea naka ayonit Edeke: abu kitodiar kotoma akuan.

Ikolosain 2:9

Naarai kotomaken iboie aiteko-ro kere naka Eidekeone kakuan.

Isaia 9:6

Naarai kiwurikinitai oni ikoku, kiinakinitai oni ikoku yenisapat: ejaenena rwaru airum okeperike: ekekiror da enyarao Lokaumokin, Ekapetan akiro, Edeke Lokagogoŋ, Papa lomam edaun, Ekapolon loka Ainapakin.

Yokana 1:4, 9-10

Kojai aijar tomaken; korai aijar nin aica naka ituŋa. Kejai aica

nakabeit naecaikini ninituŋanan ebunit toma akwap. Kejai nesi toma akwap, kesubio akwap kanuken, ido mam akwap abu koje-nu nes.

Yokana 8:58

Kotema Yesu kes atiar, . . . "Eroko Aburaam ejauna, ajai eoŋ."

1 Timoteo 2:5, 6i

Naarai ejai Edeke ediopet, ejai da ekadiekan ediopet loka Edeke ka ituŋa, nes etuŋanan Kristo Yesu, loabu kolunakin araun alakunet kanuka kere.

Kija kalakunio kotomaken, nes aisionio naka adiaakanareta. Erai nesi aput naka Edeke lomam etakani. —Ikolosain 1:14, 15i

EBAIBULI (NUKIWADIKAERE) NGES AKIROT NAKA EDEKE

Naarai emamei akirot nakedwaritai kakote naka itunanan, konye enerenenasi ituna nukepote kama ejai Edeke kodoikinite Emoyo Lokalaunan. —2 Petero 1:21

Luka 1:70, 77

Kwape enerar kolo kageunet kaituke nuka inabinoke lukalau-nak. Kitejen iketuna aitajario kotoma aisionio akecediakanareta.

2 Samuel 23:2

Kiner emoyo loka EJAKAIT kotomakan, kojaun akirotoke anajepka.

Ikisila 6:6

Akiro nu da, nukecorakini lolo, kojaananas otaukon.

2 Timoteo 3:16

Dinikirot naiwadikatai naiyena-kit Edeke ejai ajokis aisisianakinia, aikwenyaria, aitetenia, aituu-tooria da toma adolit.

Naarai nnewadikatai sek, ewadikatai kanuka aisisianakinia oni, tetere kanuka atitijikin ka aitalakara naka nukiwadikatai kidumuni amun. —Iromayon 15:4

Matayo 22:29ii

Ipaarete yesi, naarai mam ijene-te nuiwadikatai karaida apedor naka Edeke.

Isabulin 138:2ii

Naarai itopoloo ijo akonikirot adepar ekonikiror kere.

Apukokinio 19:13

Konapite anapito naebwasitai aokot; enyaritai ekekiror Akirot naka Edeke.

Yokana 1:1, 14i

Kageunet ajai Akirot, ajai Akirot mama ejai Edeke, korai Akirot Edeke. Koraun akirot akuan, ki-boiororoi kamawok.

Yesu Itodunit Edeke

2 Ikorinton 4:6

Naarai nes Edeke loabu kobala ebe, "Kocai aica kotoma amuton," loecaikinit itauonowok tetere iliyai aijen naka aibuses naka Edeke kakonyen nuka Kristo.

Yokana 1:18

Emamei ituņanan yeneanyunit

Edeke kapakio kere; Okoku loteluna, loejai atorob naka Papa, ŋol nes etejenuni.

Inera Edeke Kanejai Yesu

Iburanian 1:1, 2

Abu kolo Edeke kinera kalukapapaawok koponesio luipu luegelegela kotoma onabin; konye ka-paarasia kanu nukawasia ener kaoni kotoma Okoku, loabu kodakak araun ekeruman loka kere, kanuken da abu kosub akwapisinei.

Yokana 8:38i

Nuaanyunit kaneejai Papa kes nuenera eoņ: yes da iswamaete akiro nukiirarito kaneejai papakus.

28 AKIROT NAEJARI KANUKIWADIKAERE ITIRIANITAI

Ebaibuli Erai Inyamat luka Etau

Yob 23:12ii

Abu kenadak akiro nuka anajepeke otauka.

Matayo 4:4ii

Iwadikatai ebe, Mam ituņanan ejari kanuka atap bon, nabarai kanuka ninikirot naelomuni kaituk naka Edeke.

Ebaibuli Itacuni Esokoto Wok

Isabulin 119:105

Akonikirot nes atala naka akejeka, aica da nakosokotoka.

Isabulin 119:130

Naenarotor akonikiro itacaikinetete; itejenikinetete ijimat.

Yesu Nges Inyamat Luapote Kokuju

Yokana 6:51, 48

Arai eoņ inyamat lukajarak lukijesunos kotoma akuj; arai kenyam ituņanan inyamat lu, ebusi ikar kere; inyamat da luainakini eoņ kanuka aajar naka akwapisinei nes akakuan. Arai eoņ inyamat luka aajar.

Yesu Nges Aica naka Akwap

Yokana 1:4, 8:12

Kojai aajar tomaken; korai aajar nin aica naka ituņa. Kinera Yesu bobo kakes, kotema atiar, "Arai eoņ aica naka akwapin; yenikatu-puni eoņ mam cut elosi kamuton, konye ejaas kaica naka aajar."

**Eyangauni Ebaibuli Aijar
Naileleba Araitō**

Isabulin 1:2, 3

Konye akelakanar ejai toma oki-sil loka EJAKAIT; okisilike da eomoomaa paaran ka kuare da. Eputoori da ekitoi loiraikinitai ariri naka aleles naka akipi; loe-raenenei akeraito kedol apak, ake-kiot da mam erinyori; ikemeri kanuiswamaenenei kere.

INERAS NUKIWADIKARE NUKA YESU KRISTO

Yokana 5:39, 46

Imoete kotoma nukiwadikatai, naarai iwomito ebe ijaunete kaijar naka ikar kere kotomakec; nun da itejenunito nukaŋ... Naarai arai kiyuunito Musa, tikiyuut eoŋ da,

**Ijaikini Yesu Araitō
Nuka Aijar**

29

Yokana 15:4a, 5

Kosalakis tomakaŋ, eoŋ da tomakus. Arai eoŋ emusabibu, iraas yesi atenun. Yenesalit tomakaŋ, eoŋ da tomakeŋ, erai nin araito nuipu, naarai neamamea eoŋ mam ipedorete ibore.

naarai abu ŋesi kiwadika nukaŋ.

Luka 24:27

Kosodi ageun kama ka Musa ka inabin kere kitejen kotoma kanukiwadikatai kere akiro nuabeito ŋes.

30 AKIROT NAKA EDEKE NAEBUSI MAM IJULANAKIN

Isabulin 119:89, 160

Wu EJAKAIT, icasit akonikirot kotoma akuj ikar kere. Etiai loka akirokon nes abeit; itubesiakon luedolito kere ejaenenas ikar kere.

Isaia 40:8

Erinyorete inya, isokokoi da aturot; konye akirot naka Edekewok eperonori ikar kere.

Matayo 5:18ii

Aitodol naedaunotor akuj ka akwap, mam cut edaun inyukuta idiopet, karaida aitakinet adiopet naka ikisila, aitodol neitodolikine-re kere.

Yokana 10:35ii

Ido mam epedorete nukiwadikatai abilio.

Mam Etunganan Epedori Angirinkin Aijulakin Ebaibuli

Dinikirot kere nakecorakini yes, nipeñin iricete aiswamaenen: siri-kiyatakis ace, karaida aiñoñoor ace. —Ikisila 12:32

Siriyatanikini akekiro, kinyek nesi aitoron jo, kosodi jo araun lokeñalan. —Awaragasia 30:6

Apukokinio 22:19i

Bobo da arai elemari ituñanan kotoma akiro nuka eitabo loka adwarasit kana, elemari Edeke akorakinetekte kokitoi loka aijar.

Awaragasia 13:13i

Eyauni ñol loemenit akirot amudiario: konye einakinio loeyoñit aicorakinet eropit.

ATWANARE KA YESU ABU KITODOLIK AITEMONOKINET NAKA EDEKE

31

Yokana 10:17, 18i

Kanuka na kamina Papa, naarai ejaikini akaijar, tetere alemuni bobo. Emamei itunganan yenikademari, konye ejaikini eoŋ elopet. Ejai eoŋ apedor naka aijaikin, ejai da apedor alemun bobo.

Yokana 19:11i

Koboŋok Yesu ebe, "Ti mam jo ijaas kapedor kere mamakaŋ, arai mam kidumunit abunore kokuju."

Matayo 26:53, 54

Arai iwomitos ebe mam apedori aiŋaiŋa Papaka, kejukak kwape kwana irioŋeta luedeparito itomon ka luarei luka imalaikan? Aso edolete biai nukiwadikatai

ebe ibusakinit ŋun ajaun?

Aswamisio 3:18

Konye akiro kwa nukelimonokini Edeke ameun apeŋo kaituk nuka inabin kere ebe ibusakinit Kristoke aiticanio, etodoliki kwaŋin.

Aswamisio 2:23

Yesu ŋol, lokijaikinio kanuka ainerun ka aijen naka Edeke ameun apeŋo, ipotu yesi kibubukis, koarata kakanin nuka ituŋa lukaronok.

Isaia 53:10i

Konye itojokit EJAKAIT amacar ŋes; kisiturur; naainakinia akeijar araun asubanit kanuka aronis.

32 ATWANARE KA YESU ELIMORITOS AJENAK

Marako 15:27, 28

Kibubukis ikaṅatak iarei nepepe kaṅes; ediopet kakanike nakoteten, ka ediopet da kakanike nakokediany. [Kosodi kitodolikinoi Nukiwadikatai ebe, “Aponi kimarakinai nepepe kalukepali.”]

Yokana 19:32-37

Kopotu do iserikalei kobilata akeje nuka losodit, ka nuka lokiareit lokibubukinitoi nenipe kaṅes; konye kedolokis Yesu koanyut ebe kedau nan atwanare, mam ebila ekejeke. Konye ediopet koserikalei kicum amaranake kakwara, atipet kolomutu aokot ka akipi. . . . Naarai kedoikinete ṅun tetere

edoli nakiwadikatai ebe, “Mam ebilio akekoit.” Ka . . . “Esesenete moolo ṅol lokicumete.”

Matayo 27:45, 50-51ii, 54

Ameun kosawa lokikanyeteka-pe kojau amuton akwap kere kiton osawa lokikanyetekaonon. . . . Kodelo Yesu bobo keporoto loepol, kojaj ekemoyo. . . . ameun kokuju kiton kwap; komaran akwap; kobwaṅabwaṅas amor. Nakeanyuniata ekapolokiton ka ṅul da lu-kejaas kaṅes idarete Yesu, amaran naka akwap, ka akiro da nukiswamas, kokuriakaros noi, kobal- las ebe, “Abeit kerai teni ṅol Oko-ku loka Edeke.”

Aswamisio 2:24, 32

Konye kitajaru ŋes Edeke, kolaca ariebo naka atwanare; naarai mam epedoro aikamunit ŋes. Yesu ŋol abu Edeke kitajaru, kirai isio kere ikajenakake.

Iburanian 2:14, 15

Aso naarai imorikikinete idwe aokot ka awat, abu ŋesi da elopet komor kakes ejautenekec, tetere kanuka atwanareke emudiari ŋol loejai apedor naka atwanare, ŋes Satan. Tetere elacakini da ŋul kere lukejaas toma obulesene apaarasia kere nuka aijarakec, kanna akurian atwanare.

1 Ikorinton 15:55, 57

Wu jo atwanare, ai bo ejai ako-niipikor? Wu jo atwanare, ai bo ejai ekonitidot? Konye kimalai Edeke lokiisipikori oni kanuka Ejakaitiwok Yesu Kristo.

Apukokinio 1:18

Ido Lokajaran; abu katwanite, ido koany ajari ikar ka ikar, ajai kilaceta luka Atwanare ka luka Okatwak.

2 Timoteo 1:10

Konye kwana etakanun asianut ŋin kanuka aitodikinio naka Eketajaraniwok Kristo Yesu, loabu kitapalau atwanare, kitacau da aijar ka amamus aibos kanuka Akiro Nukajokak.

34 INYOBO IBUSAKINIT ONI ASWAM KA YESU?

Apukokinio 3:20

Koany, abwoi kokek ekuṅukuṅi; arai epupi ituṅanan kere ekaporo-to, koṅaa da ekek, alomari mama-keṅ, amori nepepe kaṅes, ṅes da keoṅ.

Iromayon 4:5

Kwabo mama ejai yenimam iswamai, konye iyuuni ṅol loitojoki luetumaaka, imarakinio akeiyuun araun adolit.

Yokana 20:22ii; 16:24ii

Kijautu Emoyo Lokalaunan. . . . kilipa, idumunete tetere itodolikin akusiilel.

Iromayon 10:9

Naarai arai ilimori kaitukukon ebe Yesu ṅes Ejakait, iyuuni da

kotaukon ebe abu Edeke kitajar ṅes kokatwak, kitajario.

Matayo 10:37i; 16:24, 25

Ḑin yenemina papake arai toto-ke adepar eoṅ, mam kebusakinit; . . . Kosodi kolimok Yesu ikekesi-siak ebe, Arai ekoto ituṅanan kere atupit eoṅ, koṅerokin ilopet ko-riṅ ekemusalaba, katup eoṅ. Na-arai ṅin yenekoto aitajar akeijar etwaniari, ka yenetwaniari akeijar kanukaṅ edumuni.

Igalatian 3:29

Ido arai iraaas luka Kristo, aso iraaas aur naka Aburaam, ikeru-mak da kwape ejaar aisumunet.

Na ɲes aitejenunet ebe, abu Edeke koinak oni aijar naka ikar kere, ejai da aijar ɲin toma Okokuke. Yenejai Okoku, ejai da aijar; yene-mamei Okoku loka Edeke emamei aijar.

—1 Yokana 5:11, 12

Ipeson 2:4, 5

Konye Edeke loebarit aitim, kanuka akemin naepol nakiminaar oni, nakitwakitor kanuka aibuca-retawok, abu kituluo oni ikajarak nepepe ka Kristo, (itajarunitai kanuka asianut.)

Igalatian 2:20i

Aponi kebubukin nepepe ka Kristo; konye ajari, kwabo mere bobo eoɲ, konye ejari Kristo koto-makaɲ; aijar da naajaria kwana

toma akuan, ajari toma aiyuun Okoku loka Edeke lokamina eoɲ.

Iromayon 8:2

Naarai kaosikis eoɲ ikisila luka Emoyo loka aijar loejai toma Kristo Yesu anyoun kokisila luka adiakar ka atwanare.

2 Ikorinton 5:17

Kanuka ɲun, arai ejai ituɲanan kotoma Kristo, arau isubat yenikitet; atuboros nukolo; koany, araut nukitetiak.

1 Petero 1:23

Naarai aponi kourii yes irwan nakiareit, mere kikinyom luebose-te, dimarai kalumam ebosete, kanuka akirot naka Edeke naejari naeperonori.

Isabulin 68:5

Edeke kotoma aiboisike naka-launan, nes papa loka ikokiok, ekeraban da loka apuserun.

Isaia 64:8; 63:16ii

Konye do, wu EJAKAIT, irai ijo papakosi; kirai isio elupe, ijo eka-jeanikosi; kirai isio kere aswam naka akanikon. Wu EJAKAIT, irai ijo Papakosi; ekosikalakunan ameun ikar kere nes Ekonikiror.

Kosea 1:10ii

Kosodi kanen, kaibois naaponi kotemarere kes ebe, "Mam iras ikatuṅa," etemario do kes ebe, "Yes odwe luka Edeke lokajaran."

Matayo 7:11; 6:9

Aso arai yes lukaronok ijenete ainakin ikusidwe ainakineta nue-jok, mam kereka itelekarit noi Papakus loejai toma akuj ainakin ṅul luilipete nes iboro luejok? . . . Aso kilipenenete yesi kwanata: Papakosi loejai toma akuj, Ekonikiror kitalaunai.

2 Ikorinton 6:17ii, 18

"Kesukunyuni eoṅ da yes. Eba-la Ejakait Lokapedor kere ebe, araun eoṅ Papa kamakus, yes da iraunos ikadwe lusap ka lupesur."

Iromayon 8:14

Naarai kere luiṅarenikinit Emo-yo loka Edeke, ṅul kes odwe luka Edeke.

Yokana 14:6, 7, 23ii

Kotema Yesu atiar, "Arai eoṅ erot, ka abeit, ka aijar da; emamei yenebuni mama ejai Papa, dimiki-to itorit tomakaṅ. Arai kiijenete eoṅ, tikijenutu Papaka da; amear kwana ijenete ṅes, ianyut da." Arai kamina itunanan, erici da akakiroṭ, eminuni Papaka, sio da kiponi mamakeṅ kitarauni ṅes ekosire.

Igalatian 4:4-7; 3:26

Abu Edeke kijuk Okokuke, lokewuruuni aberu, lokewuruunio koyaito ikisila, tetere elakuni ṅul lukeyaito ikisila, tetere oni kitaraunio odwe. Ido naarai iraaṣ odwe, abu Edeke kijuk Emoyo

loka Okokuke otauonowok, loiwo-roi ebe, "Abba, Papa!" Kanuka ṅun mam bobo irai ebulesit dimarai okoku, ido arai irai okoku, aso irai ekeruman kanuka Edeke. Naarai iraaṣ kere odwe luka Edeke kanuka aiyuun kotoma Kristo Yesu.

Konye ṅul kere lukisukunyunte ṅes, koinak apedor araut idwe luka Edeke, kes ṅul luiyuunito ekekiror. —Yokana 1:12

Arai kediaka itunanan ejai oni Ekapuron neejai Papa, Yesu Kristo ekadoliton. —I Yokana 2:1ii

Naarai kanukeṅ oni kere iarei kikunyakini Papa kotoma Omoyo ediopet. —Ipeson 2:18

38 EYANGAUNI YESU AMIN, AIYALAMA, AINAPAKIN

1 Yokana 4:8, 16ii

Yenimam emin mam ejeni Edeke, naarai erai Edeke amin. Edeke ñes amin; ñin da yenesalit toma amin, esalit toma Edeke, Edeke da esalit tomaken.

Koraas luisiaka bonik ka bonik, luitimonoros, ido kisionionoros, kwape kisionio Edeke da yes kotoma Kristo. —Ipeson 4:32

Yokana 13:35

Kanuka ñun ejenunete ituña kere ebe iras yesi ikakesisiak, arai iminanaros bonik.

Konye araito nuka Emoyo kes nupenu: amin, aiyalama, ainapakin —Igalatian 5:22i

Konye alakari toma EJAKAIT,

eyalamikin Edeke loka aitajario-ka. —Kabakuk 3:18

Isabulin 16:11

Kitodianakini eoñ erot loka aijar: neijai ijo ñes aiyalama naite-koro; akanikon nakoteten ñes ejaas nitalakarito ikar kere.

Iromayon 5:1

Aso naarai kitojokitai araun luedolito kanuka aiyuun, kajaut kainapakin mama ejai Edeke kanuka Ejakaitiwok Yesu Kristo.

Yokana 14:27

Kenyeiniata ainapakin; kainak yes akainapakin; mere kwape einakiniata akwapin, kainakinia eoñ yes. Sirikiyalononoto ikusitauon, kinyeis da akurian.

Iromayon 8:11

Konye arai iboie Emoyo loka nol lokitajaruni Yesu kokatwak kotomakus, nol lokitajaruni Kristo Yesu kokatwak einakini da akusiwat nuetwakete ajar kanuka Ekemoyo loiboie kotomakus.

1 Ikorinton 6:14

Konye abu Edeke kitajar Ejakait, kitajari oni da kapedorike.

Yokana 6:40

Naarai nuekot Papaka kes nu ebe, Yeneanyuni Okoku ka aiyuun nes kojaut kaijar naka ikar kere; etajaruni eoŋ nes kapaaran nakawasia.

Yokana 11:25, 26i

Kotema Yesu nes atiar, "Arai

eoŋ ajarun ka ajar da; nin yenikeyuuni eoŋ, karaida ketwana, ejari. Din da yenejari yenikeyuuni eoŋ mam etwani ikar kere. . . ."

1 Ikorinton 15:21-23

Naarai kwape ajaunia atwanare kanuka etuŋanan, kwape kwanin ajau da ajarun naka lukatwak kanuka etuŋanan. Naarai kwape etwakiata kere kotoma Adam, kwape kwanin ejarete da kere kotoma Kristo. Konye ninituŋanan kwape ebeikinia: Kristo nes araito nugeet; kosodete naebunio nesi nul lueraas luka Kristo.

Yokana 14:19ii

Naarai ajari eoŋ, yes da ijarete.

Iburanian 10:28, 29

Yenemwaŋi ikisila luka Musa etwani komam itimio, kanuka ika-jenak iarei arai iuni. Iwomito biai, nanyoin aiticanet naitelekari noi naibusakinit ituŋanan yenipudapudai Okoku loka Edeke, komunaa da aokot nuka aitutuket, nua-potu kitalaut ŋes, komor da Emo-yo loka asianut?

Yokana 12:48

Yenikaŋeri eoŋ, yenimam ecamuni akakiro, ejai ekatubokinanike: akirot naenerit, ŋes etubokini kapaaran nakawasia.

Yokana 8:24

Kanuka ŋun kalimokis yes ebe

itwakete kotoma adiaakanaretakus; naarai arai mam iyuunito ebe arai eoŋ, itwakete kotoma adiakana-retakus.

Luka 12:4, 5

Katemari yes ikapapero atiar, “Sirikikuriakaros luearete akuan, kosodi mam bobo nuepedorete aswam. Konye kekwenyari yes loikuriaka: kokuriaka ŋol loejai apedor kedau aiar acakakin Ogeena; eebo, katemari yes atiar, Kokuriaka ŋol. . . .”

Iburanian 2:3i

Kikwaikini ai kikui oni arai kijali aitajario naetia nen?

Aswamisio 17:31

Naarai abu kibwaik apaaran naebunio atubokin akwapin kadolit, kotuñanan loaseunit; ido itogogonit nun mama ejaas ituña kere, kanuka aitajarun nes kokatwak.

Yokana 5:22, 23i

Mam Papa etubokini idiotuñanan kere akiro, konye ainak Okoku etube kere, tetere ituña kere itopoloorete Okoku, kwape itopolooritotor Papa.

2 Ikorinton 5:10

Naarai kibusakinit kere atakanun koiñaren keicolon loka aitub loka Kristo; kodum ninituñanan nukiswamai akuanake, kwape

eswamator, arai nuejok arai nue-roko.

Iromayon 2:16i

Kapaaran naetubokinia Edeke nukaiyeiyea nuka ituña kama ka Yesu Kristo.

2 Isesalonikan 1:7ii, 8

Naka Ejakait Yesu naebunio kotoma akuj nepepe ka imalaikan luka akepedor, kotoma akim naesarani, inyañi kama kañul lumam ejenete Edeke, ka ñul da lumam erimarito Akiro Nukajokak nuka Ejakaitiwok Yesu.

Luka 19:27

Bobo da ñul lukasurupoka, lumam akotos eoñ ayait kes, koyaut ne, koarata kakonyeneka.

MAM NGUL KERE LUEBALAS EBE ETUPITOS YESU ERAAS LUKE

Tito 1:16i

Elimorete ebe ejenete Edeke, konye enjerito nes kaswamisioked; eraas luesacitai, luiulaka, luegiritoi da kañiniswam kere naejok.

Arai da emamei itunungan Emo-
yo loka Kristo, mam nin erai yeni-
ke. —Iromayon 8:9ii

Matayo 15:8

Ketopolorito ituna lu kaituke-
kec, konye elwaka ikecetaun
kama ajai.

Esekiel 33:31ii

Iboikinos kakonyenekon kwape
ikatuna, epupunete akakiro, ko-
nye mam iswamaete: naarai itodi-
kinete amin naepol kañajepakec,

konye ekecetau etupari aimakira-
kec.

Dinitunungan yenikabala eon
ebe, “Ejakait, Ejakait,” mere nes
elomuni ajakanut naka akuj;
dimarai yeniswamai nuekoto Pa-
paka loejai toma akuj. Katemare-
te luipu kapaaran kañin atiar,
“Ejakait, Ejakait, mam kereka
kipou kadwarata kokirorikon, ko-
kirorikon da keregeasi ajokin,
kokirorikon da keswamata aswa-
misio nukapedor nuipu?” Kasodi
alimor mamakec ebe, “Mam lem
kajeni yes nepecep da: konyoutu
kama ajai, yes lukeswamak nuke-
pali.” —Matayo 7:21-23

1 Yokana 2:3

Kana da nes kijenunia ebe kijeni nes, arai kiricit aicorakinetake.

Esekiel 36:27

Ebwaikini ekamoyo tomakus, ketoloto kokisilaka, ido iricete ikatubesia, kiswamata da.

Iburanian 5:9

Kosodi nakedaunia aitodolikinio, korau loeinakini nul kere luerimarete nes aitajario naka ikar kere.

Iromayon 6:18

Ido nakiwosikinere anyoun ka-diakar koraut ibulesin luka adolit.

Ipeson 2:10

Naarai kirai oni akeswamisio,

luesubunitai kotoma Kristo Yesu aswam aswamisio nuejok nukegeunia Edeke aitemonokin tetere kilosenenei kotomakec.

Iromayon 8:10, 13

Konye arai ejai Kristo kotomakus, atwakata awatekus kanuka adiakar, konye ejarete ikusimoyon kanuka adolit. Naarai arai ijarete atupar akuan, ikotosi atwakare, konye arai kitwataniasi aswamisio nuka akuan kanuka Emoyo, ijarete do.

2 Timoteo 2:19ii

Konyou kotoma amamus adolit, nin kere yenelimori ekiror loka Ejakait.

Yokana 15:18, 19

Arai kilai yes akwap, kojenutu ebe abu kala eoŋ eriŋa elaa yes. Arai kiraas lukakwap, tiemina akwap yenerai yeniken; konye naarai mam iraaŋ lukakwap, konye abu kaseu yes kotoma akwap, kanuka ŋun ŋes kilaia yes akwap.

Yokana 16:2ii, 3

Eebo, ebunit esawa loeomitor ŋinituŋanan yenikiari yes ebe ijaanakin Edeke. Iswamaete ŋun da naarai mam ejenunito Papa, karaida eoŋ.

1 Yokana 3:1

Koanyut amin naetia nen nakii-nakin Papa oni, tetere kinyaritai

idwe luka Edeke, kirai da. Kanuka ŋun ŋes mam akwapin kijeniata oni, naarai mam apotu kojenut ŋes.

Aswamisio 14:22ii

Ebe da kibusakinit alomar toma ajakanut naka Edeke kotoma aiti-canio nuipu.

2 Timoteo 3:12

Ido da ereunio kere luekotos ajar kayoŋit Edeke kotoma Kristo Yesu.

Yokana 16:33ii

Toma akwapin ejaas yes ican; konye kotitiŋikis, epiko eoŋ akwapin.

1 Petero 5:7

Kowoikis nes aiyaloŋoŋokus kere, naarai epod nes i yes.

Isaia 41:10

Sirikikurianar, naarai ajai eoŋ nepepe kajo; sirikibur, naarai arai eoŋ Ekonideke: ketogogoŋi jo; eebo, keŋarakini jo; eebo, kegaŋi jo kakan nakoteten naka adoliteka.

Isabulin 27:10

Naarai kajalakis papaka ka to-toka, konye ketanuni EJAKAIT.

Iburanian 13:6

Nes kinerar katitiŋ ebe, “Ejakait nes erai ekeŋarakinanka, mam akurianari, inyobo epedori ituŋanan aiswamakin eoŋ?”

1 Petero 4:14

Arai kiimoromoroi kanuka eki-ror loka Kristo, isirereŋitoi, naarai kidoik yes Emoyo loka aibuses, ka loka Edeke da.

Isabulin 91:11; 23:4i

Naarai einakini ikemalaikan aidar jo, koricito jo korotinikon kere. Eebo, karaida ketor aditot naka etoribe loka atwanare, mam akurianar aronis kere; naarai ijai ijo keoŋ.

Ipilipin 4:13, 19

Apedorit kere kotoma kaŋol ka-loketogogoŋi. Ekadeke da itekori luipudasi kere kwape ejaar akebar kotoma aibuses toma Kristo Yesu.

1 Ikorinton 10:13

Emamei acodunet nakidoikini yes, namam erai naka ituna kere. Konye erai Edeke lomunot, mam ejalakini yes acodunio adepar nui-pedorete, konye nenipe kacodunet itemokini neekuianara, tetere ipe-dorete atitiņikin.

1 Yokana 1:7

Konye arai kilosenenei kotoma aica, kwape ejaar ņesi toma aica, kidicenena bonik ka bonik, ido ki-tesegarete oni aokot nuka Yesu Okokuke kama kadiakar kere.

2 Timoteo 2:22

Aso koker eimiel loka atumun, konye kotup adolit, aiyuun, amin, ka ainapakin da, nepepe kaņul lui-

woneete Ejakait kotoma otauon luelaete.

Iburanian 4:16

Aso kekunyakis katitiņ mama ejai eicolon loka asianut, tetere ki-timio, kadumutu da asianut naki-ņarakini oni kapakio nuka eipud.

Iromayon 6:11

Yes da kwape kwanin koomito bonik araut lukatwak kama ejai adiakar, konye ikajarak mama ejai Edeke kotoma Kristo Yesu.

Yakob 4:7

Aso kononokikis Edeke. Kitepe-gata Satan, kikeri ņesi da yes.

Isabulin 119:11

Eņadak eoņ akonikirot otauka, kenye adiakar kamakon.

AILIP CUT NAKABEIT NGES EIDICANE KA EDEKE 47

Naitemaria atiar, “Komoata akakonyen;” kobala ekatau jo ebe, “EJAKAIT, amoenenei akonikonyen.” —Isabulin 27:8

Isabulin 62:8

Komunosi nes apaarasia kere, yes ituna; kobukokisi ikusitauon akonyeneke: Edeke nes amecisiwok.

Yeremia 17:14

Kitañaleunoi, wu EJAKAIT, ido añaleuni; kitajarai, ido etajaruun; naarai ijo ekaituritono.

1 Isesalonikan 5:17, 18

Kilipenenete tiritir, kimalaenene nete kotoma ñinikirot kere; naarai ñin nes naekoto Edeke kamakus kotoma Kristo Yesu.

Yakob 1:5

Arai ejai kayes yeniwolikinit acoa, kilip Edeke loeinakini kere kajalit, kwabo mam itoroni, nes da einakinio.

Yokana 15:7

Arai isalito tomakan, akakiro da esalito tomakus, kilipata nukotosi kere, kiswamakinio.

Isabulin 34:4

Abu kamo EJAKAIT, kabonok, kayu eoñ kotoma akurianuka kere.

Arai aomit numam adolit koutauka, mam EJAKAIT epupuni. Kanuka ekonikiror, wu EJAKAIT, kisionioi numam adoliteka naarai ipu. —Isabulin 66:18; 25:11

1 Isesalonikan 4:16, 17

Naarai edokuni Ejakait elopet abunore kotoma akuj kaiworo, keporoto loka emalaika lokapolon, ka arupepe naka Edeke. Dul da luketwakete kotoma Kristo, kes elinete ajarun; kosodi konyet oni lukijari, lukipaikinit, kiwuruporio nepepe kakes toma odoun, airiamun ka Ejakait toma apak; kwanjin kijaenena ka Ejakait apaarasia kere.

2 Ikorinton 7:1

Aso luminan, naarai kija kaisumuneta nun, ketesegaaros kotoma asilianut kere naka akuan ka naka emoyo da, ketodoloto alaunit kotoma ayonit Edeke.

1 Yokana 2:28

Kwana da, idwe ludidik, kosalata tomaken, tetere naetakanunia nesi kajaas katitiŋ, kinyeis ileic airum oni kakonyeneke naebunio nesi.

Yakob 5:8, 9

Kotitiŋonokinete yesi da, kiticata itauonokus, naarai eapie abunore naka Ejakait. Iinacan, siriŋuurianakinos, kinyeis atubokinio; koany, ebwoi ekatubon kokek.

Luka 12:40

Yes da kokapakina; naarai ebuni Okoku loka etuŋanan kosawa lomam iwomito.

KILELEBUNOS EMOYO LOKA EDEKE

Kibelonkinos kanuka aitoronoka: Koany, abukokini emoyoka mama ijaas, ketejenunete akakiro.

—Awaragasia 1:23

Kitoronikinos, kibatisaunos, ɲinituɲanan kayesi, kokiror loka Yesu Kristo, kanuka aisionio naka adiaakanaretakus; kiinakinio ainakineta naka Emoyo Lokalaunan.

—Aswamisio 2:38ii

Kwabo sirimeranakino ajon, naarai eyaunete iceleta; konye kilelebununos Emoyo, kinerene-nas kotoma osabulin, ka ikososinei, ka nupwakan nuka emoyo,

koyeenenete, kituruonokinete Ejakait luernos kotauonokus, kimalaenenete Edeke Papa apaa-rasia kere, kanuka kere, kokiror loka Ejakaitiwok Yesu Kristo. Kononokianakinos bonik koto-ma ayonɲit Kristo. —Ipeson 5:18-21

Naarai Edeke ɲes iswamai kotomakus, ainakin yes akot ka aswam da nuitojokit ɲesi.

—Ipilipin 2:13

Mam kereka ijenete ebe iraa yesi eyekalu loka Edeke, ebe da iboie Emoyo koka Edeke kotomakus? —1 Ikorinton 3:16

Scripture text reprinted from the Bible in Ateso by permission of the United Bible Societies Regional Centre, Nairobi, Kenya.

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.
World Missionary Press, PO Box 120, New Paris, IN 46553-0120 USA

Lotaai—Mere Logwelara

www.wmpress.org

9-17



Read booklets online or by App
www.wmp-readonline.org

1519 Ateso HKG